

Amaqqu illersugaanerat piniagaanerallu pillugit Namminersorlutik Oqartussat nalu-naarutaat

Piniarneq aallaaniarnerlu pillugit Inatsisartut inatsisaanni nr. 12, 29. oktober 1999-meersumi § 2, imm. 4, § 8, § 9, § 11, § 12, § 13, imm. 2 aamma 3, § 17, imm. 2, § 18 kiisalu § 21 kingullermik Inatsisartut inatsisaat nr. 1, 16. maj 2008-meersukut allanngortinneqartoq aamma pinngortitamik illersuineq pillugu Inatsisartut inatsisaanni nr. 29, 18. december 2003-meersumi § 5, § 6, § 35, § 36 kiisalu § 60, imm. 2 naapertorlugit aamma Piniarneq pillugu Siunnersuisoqatigiit tusarniarneqareernerata kingorna aalajangersarneqarput:

Atuuffik aamma nassuiaatit

§ 1. Nalunaarut manna Kalaallit Nunaanni issittumi amaqqu (Canis Lupus Arctos) illersugaanerannut piniagaanerannullu atuuppoq.

Imm. 2. Nalunaarummi matumani issittumi amaqqu matuma kingorna amaqquunik taagorneqassapput.

Imm. 3. Aqutsiveqarfiit siornatigut kommuniusimasutut paasineqassapput, llanngussaq 1 aamma 2 takukkit.

Imm. 4. Pisassiissutit amerlanerpaaffissaat amaqqu pisarineqaqqusaasut amerlanerpaaffisaattut paasineqassaaq.

Eqqissisimatitsineq, piniarneq, pisineq aamma tunisineq

§ 2. Amaqqu Kalaallit Nunaanni eqqissisimatitaapput, taamaattoq imm. 2 takujuk.

Imm. 2. Amaqqu aqutsiveqarfinni Qaanaami aamma Ittoqqortoormiini atuuttumik inuussutissarsiutigalugu piniarnermut allagartalinnit ukioq naallugu piniarneqaqqusaapput, taamaattoq § 4 takujuk.

§ 3. Amaqquq unioqutitsinikkut pisarineqarsimasup neqaanik aamma kigutaanik ilaanilluunniit allat tuniniarnissaat, pisiarinissaat imaluunniit tigunissaat inerteqqutaavoq.

Amarorniarnissamut pisassiissutit amerlanerpaaffissaannik aalajangiineq

§ 4. Naalakkersuisut amarorniarnissamut pisassiissutit amerlanerpaaffissaannik ukiumi ataatsimi imaluunniit ukiuni arlalinni atuuttunik aalajangiisinnaapput.

Imm. 2. Pisassiissutit amerlanerpaaffissaannik aalajangiinnermi makku eqqarsaatigineqassapput:

1) Piniakkat neqimik pilersuinissamut pingaaruteqartut illersorneqarnissaat amaqquinillu

akornusersorneqarnerisa minnerpaaffinngortinnissaat.

2) Piniartut atuisullu ilisimasaat.

3) Pinngortitaleriffimmiit uumassusililerinermik siunnersuineq.

4) Nunat assigiinngitsut akornanni amaqut piujuaannarnissaat piaqqioqqinnissaallu pillugit isumaqatigiissutit.

5) Inuit aamma pigisat illersorneqarnissaat.

Imm. 3. Pisassiissutit amerlanerpaaffissaannik aalajangiineq pillugu Piniarneq pillugu Siunnersuisoqatigiit, kommunit sunnerneqartut aamma kattuffiit attuumassuteqartut tusarniarneqassapput, imm. 1 aamma 2 takukkit.

Imm. 4. Pisassiissutit amerlanerpaaffissaat aalajangerneqartut tusagassiorfinnut nalunaaruteqarnikkut aamma Namminersorlutik Oqartussat nittartagaani nalunaarutigineqartassapput.

Piniariaatsit

§ 5. Amaqqunik piniarnermi taamaallaat qoorortuut atorneqaqqusaapput, sulloqqortussutsillu akuerisat minnerpaaffiat .222-iuvoq.

Imm. 2. Qoorortuut eqiinnartakkat eqittaannartakkallu atornissaat inerteqqutaavoq.

Imm. 3. Qoorortoq sunaluunniit imm. 1 malillugu amaqqunik piniarnermut atoqqusaasoq nakersarneqarsimassaaq paarilluagaassallunilu.

§ 6. Toqunartut, nammineq seqqortussiat, kiisartut, nigarsiniutit amaqqunilluunniit uninngatitsinissamut atortut tekniskiusut allat atornissaat inerteqqutaavoq.

Assartuutininik motorilinnik atuineq

§ 7. Timmisartut, qulimiguullit imaluunniit qamutit motorillit, soorlu qamuteralaat aamma ATV-t, amaqqunik piniarnermut malersuinerimullu atornissaat inerteqqutaavoq.

Amaqqumik pissatamik toqutsineq

§ 8. Amaroq pissanneqarpat piniartup pisussaaffigaa piaarnerpaamik taassuminnga toqutsinissani.

Imm. 2. Amaroq pissanneqartoq toqunneqanngippat piniartup piniarnerup naammassineqarnerata kinguinnguutigut Aalisarnermut, Piniarnermut Nunalerinermullu Naalakkersuisoqarfimmut imaluunniit KANUAANA-mi sumiiffimmi piniarnermut nakkutilliisumut tamanna nalunaarutigissavaa.

Imm. 3. Amaqqumik pissanneqartumik takunnittoqarpat sapinngisamik toqunneqassaaq kingornalu Aalisarnermut, Piniarnermut Nunalerinermullu Naalakkersuisoqarfimmut imaluunniit KANUAANA-mi sumiiffimmi piniarnermik nakkutilliisumut nalunaarutigineqassaaq.

Amaqqumik toqungasumik takunninneq

§ 9. Amaqqumik toqungasumik takunnittoqarpat nikisinnagu qimanneqassaaq kingornalu Aalisarnermut, Piniarnermut Nunalerinermullu Naalakkersuisoqarfimmut imaluunniit KANUAANAMI-mi sumiiffimmi

piniarnermik nakkutilliisumut nalunaarutigineqassaaq.

Kommunimi ileqqoreqqusat

§ 10. Kommunalbestyrelsi kommunimi ileqqoreqqusaliornikkut malittarisassanik aalajangiisinnaavoq kiisalu kommunip iluani nunaminertani aalajangersimasuni amarorniarnermut najoqqutassaliorsinnaalluni, § 2, imm. 2, takuuk.

Imm. 2. Kommunimi ileqqoreqqusaq, imm. 1 takuuk, Aalisarnermut, Piniarnermut Nunalerinermullu Naalakkersuisumit atuutilersinneqassaaq.

Pisanik nalunaaruteqartarneq

§ 11. Amaqqut pisarineqartut pissatarineqartullu tamarmik pisaqarnermik nalunaarut immersugassaq atorlugu nalunaarutigineqassapput, ilanngussaq 3 takujuk, taannalu pisaqarnerup kingusinnerpaamik ullut 14-it qaangiunneranni kommuni aqqutigalugu Aalisarnermut, Piniarnermut Nunalerinermullu Naalakkersuisoqarfimmut nassiunneqassallutik.

Imm. 2. Amaqqut pisarineqartut pissatarineqartullu tamarmik aammattaaq PINIARNEQ-mi ukiumoortumik immersugassaq atorlugu imaluunniit www.sullissivik.gl -mi ukiumoortumik nalunaarutigineqassapput.

Imm. 3. Pisaq normutalimmik nalunaaqutsiussaqaarsimappat imaluunniit radiukkut aallakaatitsissuteqaarsimappat kommuni aqqutigalugu pisaqarnermik immersukkamut ilanngullugu Aalisarnermut, Piniarnermut Nunalerinermullu Naalakkersuisoqarfimmut nassiunneqassaaq.

Allatut ajornartumik iliortariaqarneq imaluunniit imminut illersortariaqarneq

§ 12. Kalaallit Nunaanni pinerluttulerinermi inatsimmi maleruagassat malillugit amaroq allatut ajornartumik iliortariaqarnermi imaluunniit imminut illersortariaqarnermi toqunneqarpat amarortaq tamarmi Namminersorlutik Oqartussanut pigissanngortinneqassaaq.

Imm. 2. Amaqqumik toqutsisup toqutsinerup kingusinnerpaamik ullut marluk qaangiunneranni Aalisarnermut, Piniarnermut Nunalerinermullu Naalakkersuisoqarfimmut tamanna nalunaarutigissavaa. Naalakkersuisoqarfik pisoq pillugu allaganngorlugu nassuiaasiussaaq pisaqarfik, piffissaq aamma toqutsinermi pissutsit sukumiinerusut ilanngullugit.

Imm. 3. Aalisarnermut, Piniarnermut Nunalerinermullu Naalakkersuisoqarfik amaqqut inoqarfinnut qaninngoortut imaluunniit inoqarfinnukartut pillugit allaganngorlugit maleruagassanik atuutilersitsissaaq.

Nalunaaqutsiineq, eqqussineq, annissineq aamma uumasuuteqarneq

§ 13. Amaqqunik nikkinnaveersitsineq nalunaaqutsiinerlu Aalisarnermut, Piniarnermut Nunalerinermullu Naalakkersuisoqarfup akuersissuteqarneratigut aatsaat pisinnaavoq.

Imm. 2. Amaqqut, tassunga ilanngullugit amaqqut piarai, uumasuutigineqaqqusaanngillat.

§ 14. Amaqqut uumasut imaluunniit toqungasut taakkualuunniit ilaat eqquteqqusaanngillat anniseqqusaanatillu, CITES Allattuiffik I takujuk – Convention on International Trade in Endangered Species.

Immikkut akuersissuteqarneq aamma uumassusililerinikkut misissuinerit

§ 15. Aalisarnermut, Piniarnermut Nunalerinermullu Naalakkersuisoqarfiup ilisimatusarnermut imaluunniit Kalaallit Nunaata piniagassatigut pisuussutaasa nalunaarsorneqarnerannut atatillugu nalunaarummi malittarisassaniit immikkut akuersissuteqarsinnaavoq.

§ 16. Aalisarnermut, Piniarnermut Nunalerinermullu Naalakkersuisoqarfik amarorniarsinnaanermut atatillugu uumassusililerinikkut misissuinerit atugassanik amaqqup ilaanik tunniussisarnissamut piumasaqaatinik aalajangersaasinnaavoq.

Pineqaatissiisutit

§ 17. Nalunaarummi matumani § 2-mik, imm. 1, § 3-mik, § 4-mik, imm. 1, § 5-imik, § 6-imik, § 7-imik, § 8-mik, § 10-mik, imm. 1, 2 aamma 3, § 12-imik, imm. 1 aamma 2, § 13-imik kiisalu § 14-imik unioqqutitsinerit Kalaallit Nunaanni pinerluttulerinermi inatsimmi maleruagassat malillugit akiliisitsisummik kiisalu piniutininik inatsisinik unioqqutitsisumik atorineqarsimasunik pisanillu arsaarinninnermik kinguneqarsinnaapput.

Imm. 2. Imm. 1 malillugu suliat Nunatsinni Eqqartuussivimmi suliaassanngortinneqassapput.

Imm. 3. Akiliisitsinerit imm. 1 malillugu aalajangersarneqartut Nunatta Karsianut nakkartinneqassapput.

Atuutilersitsineq

§ 18. Nalunaarut manna 12. september 2020-mi atuutilerpoq.

Imm. 2. Peqatigalugu Amaqqut Kalaallit Nunaanni eqqissisimatinneqarnissaat pillugu Namminersornerullutik Oqartussat nalunaarutaat nr. 9, 5. maj 1988-imeersoq atorunnaarsinneqarpoq.

Namminersorlulik Oqartussat, ulloq 11. september 2020

Jens Immanuelson

/

Jørgen Isak Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut